

Un rat'i ora cu Tanta Dora



Conbai muchanan? Poco-poco e dianan ta pasando cu muchanan ta ricibiendo nan prome Santa Comunion. Sigur nos lo tin un ruman, primo of prima, of bisiña, of ... abo mes ta ricibi! Corda bon di sigui e ehempelnan di Cristo cu boso a siña den boso preparacion.

Ban bek un rato 2 luna pasa, dia 30 di April, dia di La Reina. E celebracion tabata grandi pasobra ta 25 aña pasa Beatrix a tuma e corona. Boso por a mira e fiesta di mainta na Wilhelmina Park? E defilé di tur e organisacionnan, tur uniforma, cu dia pa dia ta bira mas grandi. Den un organizacion asina bo ta lanta un hende corecto cu disciplina y ta pasa momentonan agradabel cu canto y comedia, musica y baile rond di kampvuur, serando amistad, y esey ta hopi importante den bida di un hende. Nan ta recuerdonan masha dushi mes pa henter bo bida.

Muchanan, boso tabata tin e dicha di mira nos reina personalmente of na television. Pero antes ta conforma cu un potret den corant. Esey tabata tempo di aña di La Reina Wilhelmina, dia 31 di augustus. E dia aki tabata wordo jama "Aña di Welechi". Como mucha nos ta bai canta aubade bistir na blanco cu sherp oranje y strik oranje den

cabey. Soeurnan ta traha e striknan y nos ta cumpra e strik na scol cerca nan. Tur mucha ta haya mescos. Den cura di St. Dominicus College y e conbento di e frerenan (awor e ta Universiteit van Aruba) gezaghebber ta para riba e balcon pa e tende nos canta.

E canticanan ta "Wilhelmus", "Schoon is de

West", "Waar de bonte huizen lagen".

Ta grita 3 biaha: "Leve de koningin" y nos ta bai den klas pa haya e saco di mangel y como nos a canta bunita su mañan no tin scol.

Na Lago Sport Park tin wega henter dia, no pa mucha so, pero mas tanto pa hende grandi. Nan ta ranca cabuya, corre cu webo den cuchara, pero e mas pret ta subi palo sebá. Esaki ta un palo halto hunta cu gris, na laira tin e premio. Ta subi un riba lomba di otro, pero ta slip bin abao. Ta te ora hopi a subi kita tur e gris por yega pa gara e premio. Claro, masha harimento, principalmente ora nan ta cerca di yega ariba, y tur ta bahsa bin abao. No mag usa trapi, ta subi un riba schouder di otro. No puntra mes con sushi nan ta keda.


Un tradicion bunita ta cu tur hende ta hisa bandera e dia ey, claro e bandera rood wit blauw, ta esey tabata nos bandera e tempo ey. Muchanan, mi ta desea boso tur cos bon, hopi bendicion y ta otro luna cu poder di Dios.





Chabalito

Number 9 - Año VII - Afl. 2,=



BIBLIOTECA NACIONAL ARUBA



3 0993 00183 397 9